

Ex-minister Benny Sevinger lo ta den corte diabierna pa caso di expropiacion di fondo

Ex-minister y parlamento, Benny Sevinger (AVP) ta bay ta den corte diabierna awo relaciona cu tratamento di caso di expropiacion di fondo. Den e caso aki, Ministerio Publico (OM) ta exige Sevinger pa paga e suma di 940 mil florin back na pais Aruba, y si no haci esaki tin posibilidad cu lo ricibi castigo di prison.

Den luna di mei aña pasa, hues a determina cu lo trata e caso di expropiacion di Sevinger despues cu e caso penal Avestruz ser trata den Corte di apelacion, y despues cu esaki haya su sentencia. E peticion pa esaki a bin di parti di abogado di Sevinger, Sr. Kock, asina e noticiero local NoticiaCla a indica.

Despues cu hues, y OM, a bay di acuerdo cu e peticion di abogado Kock, den luna di october aña pasa a trata e caso aki den pro forma y diabierna awo e lo ta den corte pa tratamiento. OM ta sospecha cu Sevinger a adkiri y a laba 940 mil florin durante e periodo



cu e tabata minister. Manera ya ta conoci Sevinger a ser condena pa su participacion den e caso penal Avestruz. Inicialmente Corte di Prome Instancia di Aruba a haya Sevinger culpabel di abuso di poder y di su funcion como minister y dun'e un castigo di un aña di prison cu seis luna condicional y tambe a inhabilit'e pa eherce un funcion publico pa un periodo di cinco aña. Se-

vinger y su ekipo no a keda contento cu e sentencia aki y a apela.

Den luna di juli aña Corte di Apelacion a duna su sentencia y den esaki a aumenta e castigo di Sevinger. Corte di Apelacion a aumenta e castigo di Sevinger cu 36 luna, pa un total di 48 luna di castigo di prizon, di cual tres aña ta condicional, y a kita tambe e posibilidad di ser elegi of



di traha como ambtenaar pa cinco aña.

Despues di e sentencia aki Sevinger a keda decepciona y a expresa cu OM ta esun cu ta corrupto y cu tin un persecucion politico su tras. Sevinger

a apela e decision y a opta pa bay Casacion. Di otro banda, OM a indica cu Casacion no lo considera e hechonan di e caso di nobo, pero si lo considera e proceduranan legal y si e decision di Hof ta bon motiva.

Declaracion di DVG encuan to barco crucero MS Eurodam

Tur barco mester entrega Declaracion Maritimo di Salud prome cu drenta puerto di Aruba

Departamento di Salud Publico a tuma nota di un publicacion riba rednan social encuan to e barco crucero MS Eurodam, caminda ta insinua cu na Aruba ta permiti malesa drenta via barco crucero mientras cu otro isla no ta permiti esaki.

Den medionan di comunicacion internacional a circula e noticia di un brote di norovirus abordo di un crucero di Holland America Line. 79 persona a bira malo durante e biahe actual di e Eurodam, ademas di nueve miembro di tripulacion, segun Centro pa Control y Prevencion di Malesa di Merca (CDC).

Nan sintoma principal tabata sacamento y diarea. E barco a sali for di Fort Lauderdale, Florida, dia 19 di februari ultimo pa un crucero di 10 den Caribe, segun CruiseMapper. Paradanan programa ta inclui Aruba, Turks and Caicos, Republica Dominicana, y otrnan.



DVG a reacciona riba e suceso, bisando: Ta importante pa keda informa comunidad cu DVG ta encarga cu e monitoreo di malesanan infeccioso cu tin abordo di tur crucero cu drenta Aruba. Esaki ta sucede por medio di e asina yama "Maritime Declaration of Health (MDH)" cu tur barco crucero ta obliga di entrega na DVG prome cu drenta e puerto di Aruba.

A base di analisis di e informacion ricibi pa medio di e MDH di 72 ora-48 ora-24 ora, diadomingo anochi

(prome cu e barco a drenta Aruba dialuna mainta) a manda un e-mail pa e operador di e crucero y su persona na su turno a manda esaki pa e dokter responsabel riba e barco, bisando lo siguiente: Aunke ta mira un disminucion den e casonan di gastroenteritis agudo (AGE), e limite permiti di 3% di AGE bou di pasahero a wordo surpassa, indicando un brote di AGE abordo.

A pesar cu DVG ta informa cu e personanan afecta ta sigui den isolacion, pa garantisa salud y seguridad di

esnan abordo y pa nos isla, mester sigui estrictamente e siguiente medida nan sanitario:

E personanan malo mester keda riba e crucero y sigui e protocol nan di isolacion te ora e dokter dicidi otro.

Aunke medidanan sanitario a wordo eleva, mester pone extra atencion y cumplimento estricto cu tur medida di higiena. Tambe di e crucero mes nan a informa nos cu nan a subi nan medida nan di higiena di nivel 2 pa nivel 3.

DVG a duna conseho y recomendacionnan valido na e

barco pa asina nan por contene e brote di Norovirus a bordo. Norovirus ta ocasiona diarea, sacamento y dolor di bariga cerca e persona afecta y ta un virus cu regularmente ta ser detecta of ta presente riba barconan crucero.

E sistema di vigilancia/ monitoreo cu DVG ta sigui ta forma parti di un programa regional Caribbean Vessels Surveillance System di Caribbean Public Health Agency (CARPHA).

Brotenan di norovirus riba crucero

E caso aki ta suma na un cantidad di brote di norovirus registra desde luna di december riba crucero, incluyendo algun cu ta bishita Aruba. Na december tabatin un brote abordo di e Zuiderdam di Holland America, y na januari tabatin un abordo di e Eurodam di e mesun linea. Y e luna aki, mas cu 100 pasahero a bira malo di norovirus abordo di e Rotterdam di e mesun Holland America Line.